

Noregs vassdrags- og energidirektorat  
Pb 5091

0301 OSLO

SAKSBEHANDLAR: ALF ERIK RØYRVIK

ARKIVKODE: 2011/2171 - 432.2

DATO: 02.05.2014

#### NAUSTDAL-GJENGEDAL VERNEOMRÅDESTYRE - HØYRINGSUTTALE TIL KONSESJONSSØKNAD KUPEKRAFT I JØLSTER

Prosjektet som Kupekraft SUS har søkt om konsesjon til er tilpassa dei reglane som står i verneforskrifta for Naustdal-Gjengedal landskapsvernrområde. Vi vil likevel kome med nokre innspel som vi vonar vil verte teke omsyn til og vektlagt i prosessen vidare.

- **Bortfall av inngrepsfri natur**

Ei utbygging av Stegsvatnet vil føre med seg tekniske inngrep lenger innover i fjellet enn det som er i dag, og dermed bortfall av inngrepsfri natur (INON). Inngrepsfri natur, og då særleg villmarksprega natur (>5 km frå teknisk inngrep) er sterkt redusert gjennom dei siste hundre åra, og det er generelt viktig å ta vare på dei områda vi har att av villmarksområder i dag.

I «kjerna» av Naustdal-Gjengedal landskapsvernrområde er det per i dag eit areal av villmark (INON Sone 1, >5 km frå teknisk inngrep) på 47,8 km<sup>2</sup>. Det er eit av dei største områda i den kategorien so langt vest i Norge. Ved utbygging av Kupekraftprosjektet vil villmarksområdet verte redusert med 13,25 km<sup>2</sup>, ein reduksjon på 27 % av dagens villmarksareal.

Dette er sjølvsagt ikkje heldig. Samstundes er INON eit administrativt og teoretisk verktøy, og det er ikkje sikkert at den negative påverknaden av landskapet i praksis vil vere like stor som bortfall av INON skulle tilseie.

- **Inngrep i landskapet**

Realisering av dei planane det her er søkt om vil føre med seg ein del inngrep i dalføret frå Legestølen og innover mot grensa til landskapsvernrområdet ved utløpet av Stegsvatnet. Dette er ein av dei viktigaste innfallsportane til Naustdal-Gjengedal landskapsvernrområde. Sjølv om inngrepa kjem utanfor det som er verna område er det viktig for totalinntrykket, og for landskapet sin art og karakter, at inngrepa ikkje vert skjemma for landskapet. Verneområdestyret vil derfor oppmode om at alle inngrep i samband med kraftutbygginga vert tilpassa landskap og terreng og gjort so lite synlege som muleg.

- **Fisken i Stegvatnet**

Det er aure i Stegsvatnet, men det har vore lite fiske i vatnet siste åra. Det bør likevel gjerast ei kompetent vurdering av kva effektar utbygginga kan ha for fisken i Stegsvatnet. Dersom utbygginga fører med seg negative effektar bør det setjast krav om avbøtande tiltak i ein eventuell konsesjon.

- **Val av alternativ**

I konsesjonssøknaden er det sett fram to alternativ; 1. inntak rett nedstraums for utløpet frå Stegsvatnet, og 2. inntak rett frå Stegsvatnet under vasslinja.

Første alternativ krev at det vert støypt ein liten inntaksdam i betong. Med denne løysinga vert alle inngrep og installasjonar utanfor grensa til verneområdet. Men dette vil verte ein synleg installasjon og eit framandelement i landskapet, sjølv om det vert plassert slik at det vert minst muleg synleg frå stien og vatnet.

I det andre alternativet skal inntaket førast direkte inn i Stegsvatnet. Inntaket skal då vere om lag 2 meter under lågaste naturlege vasstand. Dette vil føre med seg inngrep innanfor grensa til landskapsvernområdet, men totalt sett vil det i følgje søknaden føre med seg mindre synlege inngrep enn alternativ 1.

Inntak direkte i vatnet er tenkt kombinert med ein terskel i utløpet. Dette for å kunne utnytte den naturlege variasjonen i vasstand som magasin. Terskelen vil då ligge utanfor landskapsvernområdet, men verneområdestyret vil oppmode om at denne terskelen vert laga so lite synleg som muleg og gjerne kledt med stadeigen stein. Det må og førast tilsyn med at regulering ikkje går ut over den naturlege vasstandsvariasjonen.

Under dei føresetnader som her er nemnd, vil Naustdal-Gjengedal verneområdestyre råde til at alternativ 1 vert valt, slik at ein unngår fysiske inngrep innanfor grensa til landskapsvernområdet.

**PS: Vi vil gjere merksam på at det alternativ 2 krev dispensasjon frå verneforskrifta, då dette vil føre med seg inngrep innanfor landskapsvernområdet.**

Beste helsing

Håkon Myrvang (sign.)  
styreleiar

Alf Erik Røyrvik (sign.)  
verneområdeforvaltar

*Dokumentet er elektronisk godkjent og har derfor ingen signatur*

Kopi til:

Jølster kommune

Fylkesmannen i Sogn og Fjordane

Sogn og Fjordane fylkeskommune